

TRABOU I BIDA

Nos por djóin e angelnan pa trese felisidat na otronan. Dios ta e fuente di bida i lus i alegria pa e universo. Manera rayo di lus di solo, manera koriente di awa ku ta basha for di un fuente bibu, bendishonnan ta baha for di E na tur Su kriaturanan. I tur kaminda ku bida di Dios ta den kurason di hende, lo mira su influensha den amor i bendishon na otronan.

E alegria di nos Salvador tabata pa hisa i salba hende ku a kai den piká. Pa e por a hasi esei E no a konsiderá su bida komo kos presioso, pero El a soportá e krus, menospresiando infamia. Asina angelnan semper ta kla pa traha pa felisidat di otronan. Esaki ta nan alegria. Loke kurason di hende egoista ta konsiderá komo un servisio umiyante, pa sirbi esnan ku ta infelis, i bou di tur aspekto inferior den karakter i rango, ta e trabou di angelnan sin piká. E spiritu di amor i sakrifisio propio di Kristu ta e spiritu ku ta yena shelu, i ta e kos mas prinsipal di su gloria. Esaki ta e spiritu ku e siguidornan di Kristu lo tin, e trabou kua nan lo hasi.

Ora un kurason tin e amor di Kristu den dje, meskos ku fragansia dushi, e no por skonde esei. Su influensia santu ta laga tur hende ku e trata sinti su efekto. E Spiritu di Kristu den e kurason ta manera un fuente di awa den desierto ku ta basha refreská tur kos, i ta hasi esnan ku ya ta serka di muri, ansioso pa bebe di e awa di bida.

KAMINDA NA KRISTU

Amor pa Hesus lo wórdu manifestá den un deseo pa traha manera El a traha, pa bendishoná i elevá humanidat.

E lo hiba na amor, ternura i simpatia na ture kriaturanan ku ta gosa dje kuido di nos Tata Selestial.

Bida di nos Salvador riba tera no tabata un bida di komodidat i dedikashon na E mes, sino ku El a traha ku un esfuerso persistente, sinsero, inkansabel pa salba humanidat perdi. For di pesebre te na Kalvario El a sigui e kaminda di apnegashon-propio i E no a hui for di trabou duru, biahenan doloroso, kuido konstante pa otronan. Ela bisa: «E Yu di hende no a bin pa wórdu sirbi, ma pa sirbi, i pa duna Su bida pa liberashon di hopi hende.» (Mateo 20:28). Ta esei tabata e gran ophetivo di su bida. Tur otro kos tabata di ménos importansia. Su kuminda i Su bebida tabata pa hasi boluntat di Dios i kaba Su trabou. Interes propio i egoismo no tabatin parti den Su trabou.

Asina tambe esnan ku ta tuma parti den grasia di Kristu lo ta kla pa hasi kualke sakrifisio, pa otronan pa ken El a muri por tin parti tambe den e don selestial.

Nan lo hasi tur nan posibel pa hasi mundu mihó pa nan permanensia den dje. E spiritu aki ta e kresementu sigur di e alma ku berdaderamente a kombérti. Tan pronto un hende yega na Kristu, ta nase den su kurason un deseo bibu pa laga otronan sa ki amigu presioso el a haña den Hesus; e berdat ku ta salba i santifikáno por keda será

TRABOU I BIDA

den dje. Si nos ta bisti ku e hustisia di Kristu, i si nos ta yen ku e goso di presensia di Su Spiritu, nos no por keda ketu. Si nos a purba i mira ku Señor ta bon, nos lo tin algu di bisa otronan. Manera Felipe, ora el a haña e Salvador, nos lo invitá otronan pa nan bini den Su presensia. Nos lo buska manera pa presentá nan e atrakshonnan di Kristu i e realidatnan invisibel di e mundu ku lo bini. Lo tin un gran deseo pa sigui den mesun kaminda ku Hesus a kana. Lo tin un anhelo sinsero pa esnan ku ta rónt di nos por mira e «Lamchi di Dios ku ta kita piká di mundu!» (Juan 1:29).

Si nos perkurá hasi bon na otronan esaki lo resultá den bendishonnan ku lo kai riba nos mes. Esaki tabata e propósito di Dios, dunando nos un parti di hasi den e plan di redenshon. El a duna hende e privilegio di partisipá di e naturalesa divino i na nan turno drama bendishonnan riba nan próhimo. Esaki ta e honor mas haltu i e alegría di mas grandi ku Dios por a duna hende. Esnan ku di e forma aki partisipá den trabounan di amor ta wórdu halá mas serka di nan Kreador.

Dios por a duna e mensahe di e evangelio, i tur e trabou di ministerio di amor, na e angelnan di shelu. E por a usa otro medio pa realisá Su propósito. Pero den Su amor infinito, El a skohe pa hasi nos kolaborador ku n'E, ku Kristu i ku e angelnan, pa nos por ún parti den e bendishon, e alegría i elevashon spiritual ku ta resultado di e ministerio desinteresá aki.

Nos ta simpatisá ku Kristu, dor di komparti Su

KAMINDA NA KRISTU

sufrimentunan. Kada akto di sakrifisio personal pa bon di otronan lo oumentá e spiritu di bondat den kurason di esun ku ta duna, halando e persona aki mas serka di e Redentor di mundu, ku, «siendo riku, El a bira pover pa stimashon pa boso, ya boso por a bira riku pa medio di Su pobresa.» (2 Korintionan 8:9). I solamente ora ku nos kumpli asina ku e propósito ku Dios tabatin ora El a krea nos, bida por ta un bendishon pa nos.

Si bo bai traha manera Kristu tabata ke pa Su disipelnan hasi, i gana almanan p'E, lo bo sinti nesesisat di un eksperensia mas profundo i di un konosimentu mas grandi den kosnan divino, i lo bo tin hamber i set di hustisia. Lo bo roga na Dios i bo fe lo krese; i bo alma lo bebe na abundansia for di e fuente di salu. Ora bo kontra ku difikultat lo bo akudi na Beibel i na orashon. Lo bo krese den grasia i den konosimentu di Kristu i lo bo desaroyá un eksperensia riku.

E spiritu di trabou desinteresá pa otronan lo duna profundidat, stabilidat, i amabilidat, manera esun di Kristu, na e karakter, i ta,trese pas i felisidat na esun ku tin e spiritu ei. E aspirashonnan ta elevá. No tin lugar pa flohera óf egoismo. Esnan ku dje manera aki ehersé e bon modalnan Kristian lo krese i bira fuerte pa traha pa Dios. Nan lo komprondé e kosnan spiritual kla, nan lo tin un fe firme ku ta bai kresiendo, i mas poder den orashon. E spiritu di Dios, moviendo riba nan spiritu ta spiérta e armonianan sagrado di e alma, na kontesta di e toke divino. Esnan ku konsagrá nan

TRABOU I BIDA

mes asina pa trabou desinteresá na fabor di otronan, ta obrando sigur sigur nan mes salbashon. E uniko manera pa krese den grasía ta pa hasi desinteresadamente mesun trabou ku Kristu a pone den nos man— pa komprometé nos mes, te kaminda nos abilitat yega, na yuda i hasi bon na esnan ku mester di e yudansa ku nos por duna nan. Forsa ta bini di ehérsisio; aktivitat ta e kondishon mes di bida. Esnan ku ta purba mantené un bida Kristian aseptando pasivamente e bendishonnan kuta bin pa medio di grasía, sin hasi nada pa Kristu, ta simplemente tratando di biba komiendo sin traha. Pero tantu den mundu spiritual komo natural, esaki semper ta hiba e hende atras. E hende ku nenga di usa su man i pianan, pronto lo pèrdé poder pa usa nan. Di mes un forma e Kristianku no ta hasi uso di e kompromementu ku Dios a duné, no solamente lo stop di krese den Kristu, sinoku e lo pérdé e forsa ku e tabatin kaba.

E iglesia di Kristu ta e agensia ku Dios a skohe pa salbashon di hende. Su mishon ta pa hiba e evangelio na hinter mundu. E obligashon ta pa tur Kristian. Kada un di nos, te na unda su talento i oportunitat pérmít, tin ku kumpli ku loke e Salvador a manda. E amor di Kristu, revelá na nos, ta hasi nos debedor di tur esnan ku no konos'É. Dios a duna nos lus, no solamente pa nos so, sino pa komparti'é ku tur hende.

Si e disipelnan di Kristu tabata lantá pa nan deber, lo tabatin mil hende kaminda tin un so awe proklamando e evangelio den teranan pagano. I

KAMINDA NA KRISTU

tur esnan ku no por a partisipá personalmente na e obra, lo por a sostené esaki ku nan rekurso, ku nan simpatia, i ku nan orashonnan. I sigur lo por tabatin mas trabou sinsero pa e almanan den paisnan Kristian.

Nos no tin nodi di bai na tera di paganonan, óf sikiera bandoná e sirkulo será di nos hogar, si ta einan nos deber di trabou ta yama nos pa nos por traha pa Kristu. Nos por hasi esaki den sirkulo di nos hogar, den iglesia, entre nos konosinan, i ku e hendenan ku nos ta hasi negoshi ku n'é.

Mayor parti di nos Salvador Su bida aki riba mundu a wórdu usá pa traha ku pasenshi den wenkel di karpinté na Nazaret. Angelnan ministradó tabata sirbi e Señor di bida miéntras ku E tabata kana banda banda ku e hendenan di kunuku i trahadónan, sin wórdu rekonosé ni honrá. E tabata kumpliando mes fielmente Su mishon miéntras ku E tabata traha den Su fishi humilde manera ora E tabata kura esnan enférmo óf kana riba olanan brutu di tempestat di laman di Galilea. Asina, nos tambe por kana i traha ku Hesus den deberrnan mas humilde ku tin i den posishonnan mas abou den bida.

E apóstel a bisa: «Kada ken mester sigui biba den un forma responsabel den bista di Señor den e situashon ku e tabata ora Dios a yam'é.» (i Korintionan 7:24). Hende di negoshi por manehá su negoshi di un moda ku e ta glorifiká su Maestro pa motibu di su fidelidat. Si e ta un berdadero disipel di Kristu, e ta hiba su religion den tur loke e

TRABOU I BIDA

ta hasi, i revelá e Spiritu di Kristu na hende. E hómber mekániko por ta un fiel representante diligente di Esun ku a realisá trabounan humilde aya den e serunan di Galilea. Tur esnan ku tin enómber di Kristu (Kristian), mester traha di tal forma ku otronan, mirando nan bon trabou, por wórdu guiá na glorifiká nan Kreador i Redentor.

Hopi hende ta laga di duna nan don na e servisio di Kristu pasobra segun nan, otronan tabatin mihó moda i bentaha. Nan tin un opinion ku ta solamente esnan ku tin talento speshal tin ku konsagrá nan habilitatnan na servisio di Dios.

Hopi di nan a yega na pensa ku talento a wórdu duná solamente na sierto klase di hende faboresé, lagando otronan afó, ken klaro, no ta yamá pa tuma parti den e trabounan ni di rekompensanan. Pero den e parábola no ta mustra esei. Ora ku e shon di kas a yama su sirbientenan, el a duna kada un su trabou.

Ku un spiritu di amor nos por hasi e debernan di mas humilde di bida «manera pa Señor» (Kolosensenan 3:23). Si nos tin amor di Dios den nos kurason, esei lo mustra den nos bida. E olor dushi di Kristu lo rondoná nos, i nos influensia lo elevá i bendishoná.

Bo no mester warda oportunitat mihó óf habilitatnan ekstraordinario promé ku bo kuminsá traha pa Dios. No ta bon pa nos pensa sikiera loke mundu lo bisa di nos. Si bo bida diario ta un testimonio di puresa i sinseridat di bo fe, i otronan ta konvensi di bo deseo pa benefisiá nan, bo

KAMINDA NA KRISTU

esfuersonan lo no ta pérdi totalmente.

E disipel di mas humilde i di mas pober di Hesus por ta un bendishon pa otronan. Por ta ku nan no por mira ku nan ta hasiendo algun bon speshal, pero dor di nan influensa inkonsiente nan por lanta olanan di bendishon ku lo oumentá i profundisá, i kisas kual resultado nan lo sabi nunca di dje te e dia di rekompensa final. Nan no ta sinti, ni nan no sabi ku nan ta hasiendo algun kos grandi. No ta pidi di nan pa kansa nan mes ku ansiedat si nan lo tin éksito óf no. Solamente nan tin di sigui padilanti ku trankilidat, hasiendo fielmente e trabou ku e providensia di Dios ta manda, i nan bida lo no ta pórnada.

Nan mes alma lo krese kada bes mas i mas den semehansa di Kristu; nan ta trahadó huntu ku Dios den e bida aki, i asina nan ta preparando pa e trabou di mas haltu i pa e goso sin sombra di e bida ku ta bini.